



Solat Jumaat, Solat Berjemaah serta Laungan Azan dan Bacaan al-Quran di Masjid/Surau dalam Tempoh Perintah Kawalan Pergerakan (PKP)



Solat Jumaat dan Berjemaah di Masjid/Surau

Solat Jumaat dan solat berjemaah tidak perlu dilakukan kerana terdapat arahan daripada pihak berkuasa supaya tidak berbuat demikian. Pihak berkuasa memutuskan segala aktiviti berkumpul di masjid termasuk solat berjemaah dan Solat Jumaat dihentikan seketika untuk menghentikan penularan wabak Covid-19. Umat Islam diseru untuk menunaikan solat di rumah sahaja, sebaik-baiknya secara berjemaah sepanjang tempoh PKP




Laungan Azan

Laungan azan akan dilaksanakan di masjid/surau seperti biasa oleh muazzin yang bertugas. Ia penting bagi menjadi panduan dan peringatan kepada masyarakat Islam tentang masuknya masuk solat fardhu yang berkenaan. Juga sebagai mengekalkan salah satu syiar Islam yang mulia.

Lafaz azan yang dilaungkan adalah seperti berikut:



الله أكبر، الله أكبر، الله أكبر، الله أكبر،
أشهد أن لا إله إلا الله، أشهد أن لا إله إلا الله،
أشهد أن محمدًا رسول الله، أشهد أن محمدًا رسول الله،
صَلُّوا فِي بُيُوتِكُمْ، صَلُّوا فِي بُيُوتِكُمْ،
الله أكبر، الله أكبر،
لا إله إلا الله



Bacaan Ayat-ayat Suci al-Quran

Bacaan ayat-ayat suci al-Quran digalakkan untuk diperdengarkan sebelum atau selepas azan dikumandangkan, dengan tempoh masa dan kadar kenyaringan yang sesuai.



Garis Panduan Mereka yang Boleh Hadir, Tugas dan Kebersihan Di Masjid/ Surau dalam Tempoh Perintah Kawalan Pergerakan (PKP)

13 April 2020



Mereka yang Boleh Hadir ke Masjid

Para pegawai masjid yang bertugas sahaja (seorang imam, seorang muazzin dan seorang siak) boleh hadir solat berjemaah di masjid setelah benar-benar dipastikan kebersihan dan kesihatan masing-masing.



Panduan Tugas di Masjid

- a) Hadir ke masjid apabila azan dilaungkan. Hanya muazzin perlu hadir awal bagi tujuan melaungkan azan dan memperdengarkan bacaan al-Quran;
- b) Memendekkan tempoh keberadaan di masjid;
- c) Mengambil wudhuk di rumah;
- d) Tidak bersalaman;
- e) Membawa sejadah sendiri;
- f) Memastikan diri benar-benar bersih dan sihat sebelum hadir ke masjid.



Kebersihan Masjid

- i- Masjid-masjid disarankan untuk melaksanakan proses cucian / nyahkuman / disinfektan menyeluruh pada peringkat awal pelaksanaan PKP. Terutamanya selepas setiap himpunan besar-besaran seperti solat Jumaat, solat berjemaah atau program-program berskala besar.
- ii- Dalam keadaan masjid kini tidak lagi dikunjungi orang ramai, terutamanya semasa fasa 2 dan 3 PKP, disinfektan menyeluruh tidak perlu lagi dibuat.
- iii- Disinfektan masih perlu dibuat di pemegang pintu-pintu masuk yang selalu disentuh oleh para pegawai masjid yang datang bertugas.
- iv- Pihak masjid boleh merujuk pegawai perubatan yang berautoriti atau klinik kesihatan kerajaan yang terdekat untuk maklumat lanjut.

***Tertakluk kepada garis panduan rasmi yang dikeluarkan oleh pihak berkuasa agama negeri masing-masing.**



Panduan Ibadat Solat bagi Petugas Bahagian Hadapan



Petugas yang tidak memakai PPE (Personal Protective Equipment) dan boleh solat seperti biasa

i) Mengambil wudhuk dan bersolat seperti biasa dalam waktunya

Petugas yang tidak memakai PPE dan berada dalam situasi yang memerlukan jamak solat

i) Mengambil wudhuk seperti biasa

ii) Mendirikan solat secara menghimpunkan dua solat sekaligus, tetapi masih dalam waktu masing-masing selagi mampu.

Contoh: Solat Zuhur atau Maghrib dilewatkan sehingga akhir waktunya, solat Asar atau Isyak dilakukan sebaik sahaja masuk waktunya.

ii) Jika tidak mampu, boleh dijamakkan secara taqdim @ ta'khir, tetapi tidak boleh diqasrkan jika tidak memenuhi syarat musafir.



Petugas yang memakai PPE, wudhuknya diambil sebelum itu dan kekal sepanjang pemakaian tersebut



i) Mendirikan solat seperti biasa dalam waktunya

ii) Jika tidak mampu, boleh menghimpunkan dua solat sekaligus tetapi masih dalam waktu masing-masing (seperti keterangan di atas).

iii) Jika tidak mampu, boleh dijamakkan secara taqdim @ ta'khir, tetapi tidak boleh diqasrkan jika tidak memenuhi syarat musafir.

Petugas yang memakai PPE dan wudhuknya belum sempat diambil sebelum itu @ terbatal semasa tempoh pemakaian tersebut

i) Solat secara menghormati waktu tanpa wudhuk atau tayamum.

ii) Solat tersebut wajib diqadha semula apabila keadaan kembali seperti biasa.



***Petugas yang memakai PPE merangkumi bidang perubatan, keselamatan dan lain-lain yang diputuskan oleh pihak berkuasa**

****Dalam situasi kritikal, petugas akan diminta memakai PPE pada bila-bila masa. Petugas perlu menunaikan solat dengan segera jika telah masuk waktunya dan hanya menggunakan rukhsah ini jika terpaksa.**



Pengurusan Jenazah Mangsa Covid-19 (Mandi dan Kafan)

Memandikan Jenazah Mangsa Covid 19?

Hukum asal pengurusan jenazah muslim ialah dibuang segala najis pada badannya dan dimandikan. Menurut kajian perubatan, masih terdapat virus pada badan jenazah mangsa Covid-19 untuk beberapa hari selepas kematiannya. Justeru, jenazah tersebut tidak akan dimandikan dan digantikan dengan tayamum.



Tayamum Jenazah Mangsa Covid 19

Jenazah akan ditayamumkan dengan tanah yang suci pada muka dan tapak tangan jenazah. Jika terbukti kaedah tayamum biasa ini boleh memudaratkan petugas, alatan yang sesuai boleh digunakan untuk menyapu debu kepada anggota tayamum jenazah dengan tujuan untuk meminimumkan sentuhan terhadap jenazah. Petugas yang mengendalikannya akan memakai PPE sepenuhnya dan wajib mematuhi SOP yang telah ditetapkan.



Mengafankan Jenazah Mangsa Covid 19

Jenazah boleh dikafankan dengan kain kafan yang biasa. Namun, ia perlu dibaluti dengan beg plastik serta diletakkan bahan kimia tertentu bagi proses nyahkuman agar virus tidak merebak kepada petugas yang mengendalikannya.



Tempat Pengurusan Jenazah

Proses mentayamumkan dan mengafankan jenazah ini hendaklah diuruskan di pusat pengurusan jenazah yang telah ditentukan oleh pihak berkuasa tanpa perlu kehadiran ramai. Ia akan dikendalikan oleh petugas terlatih yang telah dilantik oleh pihak berkuasa.





PENGURUSAN JENAZAH MANGSA COVID-19 (SOLAT)

1 SOLAT JENAZAH SEPERTI BIASA

Hukumnya wajib bagi memenuhi tuntutan fardu kifayah. Dilakukan oleh para petugas yang mengendalikan jenazah tersebut dan ahli keluarga terdekat yang dibenarkan untuk hadir, walaupun hanya ke tanah perkuburan. Dalam keadaan ini, mereka akan bersolat jenazah di atas kubur tersebut

2 SOLAT JENAZAH GHAIB

DEFINISI :

Solat ke atas jenazah yang berada di luar kawasan mereka yang mengerjakan solat tersebut, sama ada jaraknya melebihi dua marhalah atau kurang

HUKUM SOLAT JENAZAH GHAIB KE ATAS MANGSA COVID 19

Boleh atau sunat dilakukan jika memenuhi syarat-syarat sahnya, dalam keadaan pihak berkuasa melarang orang ramai berada pada tempat yang sama dengan jenazah tersebut semasa tempoh PKP ini.

KAIFIAT/CARA MENERJAKAN SOLAT JENAZAH GHAIB

Sama seperti kaifiat solat jenazah yang berada di hadapan imam.

SYARAT-SYARAT SAH JENAZAH GHAIB YANG DISOLATKAN



Islam



Bukan mati
syahid



Jenazah telah
dimandikan
@ ditayamum




Orang yang
mengerjakan solat
jenazah itu telah
baligh ketika kematian
jenazah tersebut



Panduan Pengisian Ibadat Ramadhan Sepanjang Tempoh PKP/Wabak Covid-19



Diteruskan Seperti Biasa



- 1- Puasa pada siang hari Ramadhan dengan menjaga segala rukun, syarat dan adabnya. Serta mengelakkan perkara-perkara yang membatalkan puasa dan pahalanya.
- 2- Mendirikan solat fardu pada awal waktu secara berjemaah di rumah masing-masing.
- 3- Melewatkan makan sahur dan berbuka dengan segera apabila yakin telah masuk waktunya.
- 4- Melakukan perkara-perkara sunat yang disyariatkan secara individu seperti solat-solat sunat, mengaji al-Quran, bersedekah, bermunajat, berzikir dan sebagainya.



Diteruskan dengan Sedikit Perubahan

- 1- Solat Tarawih
Hanya dilakukan di rumah masing-masing bersama ahli keluarga. Ketua atau ahli keluarga yang mengetuai solat ini perlu mempunyai bacaan al-Quran yang baik dan mengetahui kaifiat solat tarawih yang betul.
- 2- Bertalaqqi/bertadarus al-Quran
Hanya dilakukan di rumah masing-masing bersama ahli keluarga. Perlu ada ahli yang mahir dalam bacaan al-Quran untuk menjadi rujukan.
- 3- Iftar dan bersahur jamaie anjuran pihak masjid, organisasi @ individu
Tidak dibenarkan. Hanya dilakukan di rumah masing-masing bersama ahli keluarga.
- 4- Qiyamullail berjemaah
Hanya dilakukan di rumah masing-masing bersama ahli keluarga.
- 5- Kuliah/Pengisian sempena Ramadhan
Menyertai pengisian secara atas talian oleh pihak masjid @ berkepentingan.
- 6- Membayar zakat fitrah @ zakat harta
Menggunakan kemudahan atas talian seperti yang ditetapkan oleh pusat zakat negeri masing-masing.



HUKUM DAN PANDUAN BERPUASA BAGI PETUGAS BARISAN HADAPAN COVID-19

Hukum Berpuasa Petugas

Secara umumnya, petugas barisan hadapan tetap diwajibkan berpuasa sekiranya mereka memenuhi syarat-syarat wajib berpuasa:

- i - Islam,
- ii - mukalaf
- iii - berupaya mengerjakannya,
- iv - puasa tidak memudaratkan dirinya,
- v - anak bulan Ramadan telah kelihatan atau menggenapkan 30 hari bulan Syaaban
- vi - bermukim.

Jika petugas yang bekerja di tempat yang panas dan berpeluh banyak dalam pakaian Personal Protective Equipment (PPE), kemungkinan dia akan terdedah kepada dehidrasi atau kurang air dalam badan. Biasanya, ia melibatkan tempoh pemakaian PPE yang agak lama.

Perkara ini adalah subjektif, bergantung kepada individu, proses kerja atau persekitaran. Sekiranya faktor-faktor yang membawa kepada keadaan yang berpeluh banyak dan menyebabkan keletihan melampau, petugas tersebut diharuskan untuk tidak berpuasa.

Jika petugas tidak berpuasa kerana keuzuran syarie seperti yang dinyatakan, dia wajib menggantikannya semula apabila Ramadan telah berakhir dan keadaan kembali pulih seperti biasa.

Panduan Berpuasa Petugas

- i - Berniat puasa pada malam hari atau ketika bersahur.
- ii - Melaksanakan puasa seperti biasa mengikut kemampuan.
- iii - Diharuskan berbuka apabila tidak mampu berpuasa sepanjang hari tersebut @ dikhuatiri menjejaskan fokus dan kemampuannya untuk bertugas sekiranya meneruskan puasa.
- iv - Merahsiakan daripada umum bahawa mereka tidak berpuasa
- v - Menghormati Ramadan dengan tidak makan dan minum di tempat awam @ terbuka.
- vi - Wajib menggantikan puasa yang ditinggalkan selepas berakhir bulan Ramadan.




PROSEDUR-PROSEDUR SARINGAN COVID-19 DAN KESANNYA TERHADAP PUASA PESAKIT

UJIAN SWAB (SAPUAN) KERONGKONG

Memasukkan batang lidi atau besi halus yang bersalut kapas bersteril di hujungnya ke dalam kerongkong melalui rongga hidung atau mulut. Tujuannya ialah untuk mengambil cairan di dalam kerongkong itu untuk diuji dalam makmal dan menentukan wujudnya virus berkenaan atau tidak.

Hukum: Jika batang lidi atau besi halus itu masuk sehingga ke pangkal hidung, puasa seseorang itu terbatal menurut mazhab Syafie kerana berlaku kemasukan ke dalam batin rongga yang terbuka iaitu hidung.

Kebanyakan fatwa kontemporari menyatakan bahawa prosedur ini tidak membatalkan puasa.



UJIAN SERUM DARAH

Mengambil darah pesakit dan diuji sama ada dengan menggunakan kit ujian pantas atau proses makmal untuk mengesan kewujudan antibodi atau tidak.

Hukum: Tidak membatalkan puasa kerana tidak berlaku kemasukan ke dalam batin rongga yang terbuka



Hukum Zakat Fitrah dan Kaedah Pembayaran Semasa Wabak Covid-19/PKP

Definisi

Mengeluarkan harta tertentu dengan kadar tertentu pada waktu tertentu kepada golongan tertentu dengan syarat tertentu. Dinamakan zakat fitrah kerana harta yang dizakatkan adalah makanan asasi yang menjadi makanan utama secara fitrah masyarakat setempat.

Kadar Bagi Tahun 1441H

Berbeza mengikut ketetapan negeri masing-masing. Sila rujuk pengumuman rasmi yang dibuat oleh pihak berkuasa negeri.

Syarat Wajib

- Islam
- Hidup semasa terbenam matahari hari terakhir Ramadan
- Mempunyai lebihan makanan asasi untuk keperluan diri pembayar dan orang yang di bawah jagaannya pada malam idul fitri

Waktu dan Hukum Pembayaran

Hukum	Waktu
Harus	Sepanjang Ramadan
Wajib	Pada malam idul fitri
Afdal	Terbit matahari 1 Syawal sehingga sebelum solat hari Raya

Kaedah Pembayaran Semasa Wabak Covid-19/PKP

i- Atas talian

Adakah pembayaran atas talian sah di sisi syarak?

Ya, sah di sisi syarak.

Bilakah niat pembayaran zakat dibuat?

Dibuat semasa pembayar mengasingkan hartanya yang akan dizakatkan. Dalam kes ini, penyertaan niat adalah sewaktu pembayaran sedang dilakukan sama ada dengan menulis jumlah atau nilai dizakatkan atau semasa menekan butang akhir proses pembayaran.

Adakah sah zakat jika tidak berlafaz?

Sah dan tidak menjejaskan pembayaran tersebut.

Namun, pihak bank atau pusat zakat biasanya akan memaparkan lafaz akad tersebut di paparan skrin pembayar dan pembayar bolehlah membaca lafaz tersebut.

ii- Secara tunai

Umat Islam masih boleh membayar zakat fitrah secara tunai seperti sebelum ini terus kepada para amil yang bertauliah selagi pihak urusan zakat negeri melantik mereka secara rasmi. Ia agak terhad pada musim sebegini dan tertakluk kepada negeri masing-masing. Sila rujuk kepada pekeliling rasmi yang dikeluarkan.



Pematuhan terhadap Segala Ketetapan Pemerintah Sepanjang Wabak Covid-19

- Sejak wabak Covid-19 melanda negara, pihak berkuasa telah melaksanakan dasar dan membuat arahan yang jelas membabitkan kepentingan rakyat dan negara.
- Ia wajib dipatuhi selagi tiada arahan yang jelas bercanggah dengan syarak.
- Kewajipan ini terpakai kepada sesiapa sahaja baik orang-orang kenamaan, golongan agamawan, golongan profesional, dan semua lapisan masyarakat.
- Mana-mana pelanggaran terhadap arahan tersebut tanpa alasan yang kukuh adalah haram dan berdosa di sisi syarak.
- Firman Allah SWT:

يَا أَيُّهَا الَّذِينَ آمَنُوا أَطِيعُوا اللَّهَ وَأَطِيعُوا الرَّسُولَ وَأُولِيَ الْأَمْرِ مِنْكُمْ

Maksudnya: Wahai orang yang beriman, taatilah Allah, taatilah Rasul dan Ulil Amri (pemegang kekuasaan) antara kamu. (al-Nisa': 59)

- Fatwa Dar al-Ifta' al-Misriyyah (26 April 2020) menyebut:
Maksudnya: "...Apabila terdapat masalah umum yang menepati syarat-syaratnya, maka tindakan pemerintah yang dibina atas neraca syarak dan sahih wajib dilaksanakan dan diamalkan. Ia tidak harus berdolak-dalik untuk melepaskan diri dari pada kewajipan tersebut. Ketika itu, rakyat wajib mendengar dan mentaatinya.
- Antara masalah yang terbesar di sebalik pemuatan ini ialah memelihara nyawa yang termasuk dalam Maqasid Syariah. Kaedah fiqh menyatakan:

تصرف الإمام منوط بالمصلحة

Maksudnya: Tindakan pemerintah adalah tertakluk kepada masalah.

Kepatuhan ini termasuklah dalam:

- i- Perintah Kawalan Pergerakan (PKP)
 - ii- Perintah Kawalan Pergerakan Diperketatkan (PKPD),
 - iii- Perintah Kawalan Pergerakan Bersyarat (PKPB)
 - iv- Kewajipan hadir melakukan saringan,
 - v- Kewajipan melakukan kuarantin dan sebagainya.
- Pihak berkuasa dan petugas barisan hadapan telah menggembelng seluruh tenaga dan kemampuan mereka untuk menangani wabak yang boleh mengancam nyawa ini.
 - Menjadi tugas rakyat untuk sama-sama menjayakan misi ini dengan mematuhi segala arahan yang dikeluarkan.
 - Ia boleh menjadi asbab dihindarkan segala musibah yang telah menjejaskan nyawa, kesihatan rakyat serta meporak-perandakan ekonomi negara dan global.



PANDUAN SAMBUTAN HARI RAYA IDULFITRI DALAM TEMPOH PERINTAH KAWALAN PERGERAKAN BERSYARAT

BAHAGIAN 1



1- TAKBIR HARI RAYA

Bermula pada malam hari raya apabila masuk waktu Maghrib malam 1 Syawal dan berakhir apabila solat sunat hari raya mula dilaksanakan. Takbir boleh dilakukan di masjid atau surau oleh imam, bilal, siak atau secara rakaman serta diperdengarkan kepada ahli kariah. Digalakkan juga bertakbir hari raya di rumah masing-masing. Takbir dari rumah ke rumah yang menjadi kebiasaan sesetengah kawasan tidak dibenarkan.



2- MEMBERSIHKAN DIRI DAN MEMAKAI PAKAIAN TERBAIK

Ketua keluarga perlu memastikan ahli keluarganya bersiap untuk berhari raya dengan bangun awal pagi, membersihkan diri, berwuduk, solat subuh berjemaah dan bersedia untuk menunaikan solat sunat hari raya bersama-sama. Mereka masih dituntut untuk memakai pakaian terbaik serta bersarapan dahulu sebelum melakukan solat sunat Idul Fitri.



3. SOLAT SUNAT IDULFITRI

Dalam keadaan pihak berkuasa masih belum membenarkan solat sunat Idul Fitri di masjid, ia boleh dilakukan di rumah bersama ahli keluarga masing-masing dengan kaedah yang sama seperti kebiasaan sebelum ini. Solat ini boleh dilaksanakan berserta dengan khutbah atau sebaliknya. Teks khutbah ada disediakan oleh kebanyakan pihak berkuasa agama negeri.



PANDUAN SAMBUTAN HARI RAYA IDULFITRI DALAM TEMPOH PERINTAH KAWALAN PERGERAKAN BERSYARAT

BAHAGIAN 2



4- SAMBUTAN HARI RAYA DAN SALING MENGUCAPKAN TAHNIAH

Sambutan hari raya hanya boleh dilakukan sesama ahli keluarga terdekat dalam rumah yang sama sahaja. Perlu mematuhi prosedur standard operasi (SOP) seperti tidak melebihi 20 orang pada suatu masa, menjaga jarak sosial dan kebersihan diri. Ucapan tahniah dan doa kebaikan sesama muslim boleh dilakukan melalui kaedah dalam talian dengan pelbagai kemudahan media sosial hari ini, selagi ia tidak menimbulkan fitnah.



5. MENYEMPURNAKAN BAYARAN ZAKAT FITRAH

Ketua keluarga atau individu yang belum menunaikan zakat fitrah dituntut untuk bersegera berbuat demikian sebelum solat sunat Idul Fitri. Makruh membayar zakat fitrah selepas solat tersebut sehingga berakhir 1 Syawwal. Membayar zakat fitrah selepas waktu maghrib 2 Syawwal adalah haram jika tanpa sebab.

Pembayaran boleh dilakukan melalui kaaedah dalam talian atau amil bertauliah.

**Selamat Hari Raya
Aidilfitri**

Daripada JAWATANKUASA PENERBITAN RISALAH HUKUM COVID-19



GALAKAN MERAHAI KELEBIHAN BULAN SYAWWAL DAN PUASA ENAM SYAWWAL SEPANJANG TEMPOH PKPB

PENGERTIAN

Bahasa:
Meningkat

Istilah:
Salah satu bulan dalam kalendar Arab, diperakui oleh Islam dan digunakan dalam takwim Hijrah sehingga kini. Kedudukannya ialah yang ke-10 daripada 12 bulan.



PERISTIWA-PERISTIWA BESAR

- i. Perang Uhud (13 Syawal 3 Hijrah)
- ii. Perang Bani Qainuqa' (Tahun Ke-2 Hijrah)
- iii. Perang Al-Ahzab/Khandaq (Tahun Ke-5 Hijrah)
- iv. Perang Hunain (Tahun Ke-8 Hijrah)
- v. Perang Taif (Selepas Perang Hunain)
- vi. Pernikahan Nabi SAW Dengan Aisyah dan Ummu Salamah R.A.

KELEBIHAN BULAN SYAWWAL

A-IDUL FITRI

Hadiah kemenangan beribadat dalam bulan Ramadan sempena kembali kepada fitrah insan. Masa untuk bertakbir, bertasbih, bertahmid dan menyucikan Allah. Panduan sambutan telah dinyatakan dalam Bil. Terdahulu.

B-HIMPUNAN RUKUN-RUKUN ISLAM

Dua kalimah syahadah, solat, zakat (harta dan fitrah), puasa (ganti @ sunat) dan haji (sudah boleh berniat haji) pada bulan Syawal.

C- PENSYARIATAN PUASA ENAM HARI

Sabda Rasulullah SAW:

Mafhum: "Barangsiapa berpuasa Ramadan, kemudian ia menyambung dengan enam hari pada bulan Syawal, seolah-olah ia berpuasa sepanjang masa." (Riwayat Muslim)

PELAKSANAAN PUASA SYAWWAL

- I. Sunat berturut-turut dari awal (selepas 1 Syawal).
- II. Boleh disambung @ diceraikan selagi masih dalam bulan Syawal.
- III. 3 hari sebelum 13 Syawal dan 3 hari-hari cerah (13-15 Syawal) atau 3 hari selepasnya

HIKMAH PUASA SYAWWAL

- a. Melengkapkan pahala berpuasa sepanjang tahun/masa.
- b. Menyempurnakan ibadah puasa Ramadan, bersekali dengan puasa Syaaban sebelumnya. Ia ibarat solat sunat rawatib yang dikerjakan sebelum dan sesudah solat fardu.
- c. Menandakan penerimaan puasa Ramadan kerana biasanya sesuatu kebaikan akan disusuli dengan kebaikan yang lain.
- d. Menzahirkan kesyukuran atas nikmat keampunan dan ganjaran kurniaan Allah pada hari raya.

KELEBIHAN BERPUASA SUNAT SYAWWAL DALAM TEMPOH PKPB

- a- Tiada sambutan hari raya secara terbuka @ besar-besaran.
- b- Tiada ziarah-menziarahi @ rumah terbuka.
- c- Puasa lebih berkualiti kerana kurang pergaulan sosial @ pergerakan yang tidak perlu.
- d- Amalan soleh dan kualitinya kian meningkat ketika berlakunya musibah.



PENGUNAAN PENCUCI TANGAN (*HAND SANITIZER*) BAGI MENCEGAH WABAK COVID-19



LATAR BELAKANG DAN ISU

Pencuci tangan (*hand sanitizer*) ialah satu bahan yang digunakan oleh petugas perubatan ketika rawatan. Penggunaan ini kemudiannya diperluaskan kepada masyarakat awam sebagai satu bentuk pencegahan daripada penularan wabak.

Dalam melakukan ibadah solat, antara syarat sah yang wajib dipatuhi adalah menghilangkan najis yang terdapat pada badan, pakaian dan tempat solat. Apakah kesan penggunaan *hand sanitizer* tersebut terhadap kesahihan solat? Ini kerana ia mengandungi kandungan alkohol yang tertentu.

MAKLUMAT ASAS *HAND SANITIZER*

Syarat untuk membuat *hand sanitizer* ialah mesti mengandungi lebih 60% alkohol.

Kandungan alkohol itu mempunyai 2 fungsi utama, iaitu untuk membunuh bakteria dan mengha-lau virus yang terdapat pada permukaan kulit, serta menjadikan cairan itu cepat kering dalam tempoh kira-kira 30 saat.

Ia merupakan bahan yang efektif untuk fungsi tersebut berbanding mencuci tangan menggu-nakan air dan sabun. Ini penting bagi kegunaan segera apabila berada di lapangan.

Hand sanitizer mempunyai tiga bentuk formulasi iaitu cairan, gel, dan buih (*foam*). Kesemuanya mempunyai fungsi yang sama.

HUKUM PENGUNAAN

Pada asasnya, alkohol merupakan najis kerana ia termasuk dalam cecair yang memabukkan. Nabi SAW bersabda yang maksudnya:

"Setiap yang memabukkan adalah arak dan setiap arak adalah haram." (Riwayat Muslim)

Muzakarah Jawatankuasa Fatwa Kebangsaan (1984) telah membincangkan alkohol menurut pandangan Islam. Antara keputusannya ialah: Ubat-ubatan dan pewangi yang ada kandungan al-kohol adalah harus dan dimaafkan.

Justeru, walaupun *hand sanitizer* diperbuat daripada alkohol, ia adalah tidak najis dan boleh di-gunakannya ketika hendak melakukan solat serta tidak dikira menanggung najis.

Alkohol yang dimasukkan ke dalam *hand sanitizier* ialah bukan arak seperti yang difahami oleh sebahagian masyarakat. Ia buatan saintifik yang bukan bertujuan arak. Kaedah pembuatannya juga tidak sama dengan pembuatan arak.

KESIMPULAN

Para petugas bahagian hadapan dan orang ramai boleh menggunakan *hand sanitizer* ini tanpa ragu-ragu demi kebaikan bersama.



PENGUNAAN WANG TABUNG MASJID UNTUK TUJUAN KEBAJIKAN KETIKA WABAK COVID-19

LATAR BELAKANG DAN ISU

Umat Islam di Malaysia terkenal dengan sifat dermawan mereka. Antara destinasi derma yang sering dituju ialah tabung masjid. Sebagai menghormati hasrat penderma, pengurusan masjid hendaklah sentiasa berhati-hati dengan pengurusan duit tabung masjid dengan membelanjakannya berdasarkan niat penderma.

Ketika berlaku wabak, hukum mengambil duit tabung masjid untuk diberikan kepada mereka yang berhajat dalam kalangan ahli kariah perlu dilihat kepada tujuan tabung itu dibuat.

KATEGORI TABUNG MASJID SERTA HUKUM PENGGUNAANNYA:

BIL	KATEGORI TABUNG	HUKUM PENGGUNAAN
I	Tabung wakaf masjid	Tidak dibenarkan digunakan untuk perkara-perkara selain hal-ehwal masjid.
II	Tabung khairat am dengan nama yang pelbagai seperti tabung am masjid, tabung fi sabilillah, tabung bantuan, tabung serba guna ahli kariah, tabung pengurusan umum masjid dan lain-lain	Harus digunakan untuk menolong orang-orang susah dalam kalangan ahli kariah.
III	Tabung khairat khas masjid (seperti tabung pengurusan khas masjid, tabung pembangunan masjid dan lain-lain).	Tidak boleh digunakan selain tujuan khas tersebut.
IV	Tabung program-program tertentu seperti tabung Ihya' Ramadan dan sebagainya	Tidak boleh digunakan kepada orang-orang susah dalam kalangan ahli kariah.
V	Tabung derma orang ramai untuk masjid yang tidak diketahui niatnya	Menurut uruf dan kebiasaan di sesetengah negeri, ia dianggap tabung khairat khas.

PERMASALAHAN DAN SOLUSI

Bagi masjid yang tidak ada tabung khairat am, pihak pengurusan boleh membuat pengumuman untuk meminta izin kepada ahli kariah untuk digunakan duit tabung khairat khas (No. III) dan tabung program (No. IV) bagi menolong orang-orang susah dalam kalangan ahli kariah sama ada:

- Meminta izin untuk diambil duit daripada dua tabung tersebut untuk diberikan dahulu kepada mereka yang berhajat tadi. Kemudian, kadar perbelanjaan itu diganti balik dengan sumbangan pada masa datang.
- Menukar status duit daripada dua tabung itu sebagai tabung khairat am masjid.

KESIMPULAN DAN PENUTUP

Dalam tempoh PKP/PPKM ini, persetujuan ahli kariah yang biasanya merupakan penyumbang tetap tabung tersebut masih boleh dimohon melalui pelbagai saluran komunikasi dan media sosial yang ada pada hari ini. Walau bagaimanapun, keadaan masih lagi belum terdesak untuk berbuat demikian kerana masih terdapat banyak bantuan dan peruntukan kerajaan, derma dan agihan sumbangan pertubuhan-pertubuhan dan orang perseorangan. Hukum penggunaan tabung masjid berkenaan tertakluk kepada perubahan jika berlaku keadaan darurat.



KEMUDAHAN MORATORIUM BANK SEMASA WABAK COVID-19

BAHAGIAN II



Hukum pemberian moratorium oleh pihak bank



• Pemberian moratorium oleh institusi kewangan kepada peminjam/pelanggan yang menghadapi kekangan kewangan sementara berikutan pandemik COVID-19 merupakan perbuatan terpuji pemberi hutang kepada pihak berhutang dan berasaskan kontrak ihsan yang bersifat su-karela atau budi bicara.

• Pemanjangan tempoh akan memberi ke-lapangan kepada penghutang dalam men-jalankan urusannya. Dalam amalan per-bankan Islam semasa turut mempunyai kontrak ihsan seperti pemberian ibra' atau rebat kepada pelanggan yang melunaskan hutang lebih awal daripada tempoh yang dipersetujui semasa akad.

• Namun, pemberian moratorium tidak boleh disertakan dengan penambahan baki akhir hutang yang telah diberikan kepada peminjam. Jika berlaku sebarang penambahan, ia termasuk dalam kategori riba al-Jahiliyyah dan diharamkan.

Sekiranya, pihak institusi kewangan ingin mengenakan kadar tambahan, ia mestilah dilakukan dengan menandatangani perjanjian baharu dengan menyatakan kadar baharu dan mendapat persetujuan peminjam.

• Firman Allah, mafhumnya: "Dan jika orang yang berhutang itu sedang mengalami kesempitan hidup, maka berilah tempoh sehingga dia lapang hidupnya". [Al-Baqarah 2:280] dan Sabda Rasulullah S.A.W. yang bermaksud: "Allah merahmati seseorang yang bersikap lapang dada apabila membeli, menjual dan mengutip hutang". [al-Bukhari].



Hukum penerimaan moratorium oleh pihak peminjam

Pemberian moratorium ini adalah disebabkan oleh krisis Covid-19 yang memberi kesan menyeluruh kepada semua pihak secara langsung atau tidak langsung, termasuklah kepada mereka yang berkemampuan membuat pembayaran. Selain itu, pemberian ini dibuat atas saranan kerajaan, demi kemaslahatan ekonomi secara menyeluruh. Ia bertepatan dengan kaedah fiqh yang berbunyi :

"Tindakan kerajaan ke atas rakyat adalah berdasarkan kemaslahatan".

Hutang dibolehkan ketika wujud keperluan dan kepentingan. Islam tidak menggalakkan berhutang jika bertujuan untuk bermewah-mewah. Supaya kemudahan ini tidak disalahgunakan. Antara syarat dibolehkan menerima moratorium Covid-19:

• Penghutang mestilah menerima kesan langsung atau tidak langsung akibat krisis Covid-19. Antara kesannya adalah mereka tidak mampu untuk membayar hutang bulan semasa ataupun berisiko besar hilang kemampuan dalam masa terdekat. Sebagai contoh, mereka yang hilang pekerjaan ketika PKP atau syarikat tempat bekerja sedang mengalami kemerosotan pendapatan sepanjang tempoh PKP. Begitu juga dengan mereka yang menerima kesan tidak langsung seperti peningkatan perbelanjaan secara mendadak dan ketidakselesaian atau perubahan drastik terhadap rutin perbelanjaan harian yang mengakibatkan kos perbelanjaan melebihi pendapatan.

• Islam menghendaki peminjam yang berkemampuan untuk menyegerakan pembayaran pembiayaan. Hukum melambatkan atau menangguhkan pembayaran hutang bagi mereka yang berkemampuan tanpa sebarang alasan yang kukuh adalah haram. Sabda Rasulullah S.A.W. yang bermaksud: "Menangguh pembayaran (hutang) bagi orang yang mampu adalah kezaliman..." [al-Bukhari].

Kemampuan untuk membayar hutang perlu mengambil kira keperluan mempunyai dana kecemasan yang mencukupi. Dana kecemasan yang disarankan untuk kelangsungan hidup adalah sekurang-kurangnya 3-6 bulan. Justeru, jika peminjam telah mempunyai dana kecemasan yang mencukupi, peminjam tersebut seharusnya meneruskan komitmen bulanan mereka seperti biasa.